

欽定剿平粵匪方略

欽定勦平粵匪方略卷九十一 甲寅年

四月二十日 戊子 勝保奏言 臣前於十一

捷報後傳令各官兵班師北上旋據豐縣稟稱  
沛縣樓子集等處有餘匪二三百名其爲初十  
日鳧水得生之賊無疑臣因一面料理起程一  
面囑令善祿暫留督辦十五日行抵濟甯據黑  
龍江協領那爾胡善等稟稱初十日落水淹斃

之賊內有鳧水逃至彼岸者約三百餘人竄入各村覓食造飯仍謀渡黃竄逸經我兵上前剿捕殺斃二百餘名餘匪情急奔逃復經徐州兵勇在河岸兜捕截殺查看河灘之上羸馬陷死泥淖及賊屍浮積甚多徧搜各村實已無賊亦無一賊渡河倖逃者此項零匪業已勦盡無遺臣已催善祿趕緊督帶步隊官兵由運河西岸

前赴東昌一帶以便迎擊阜城竄賊

勝保又奏言此次臨清潰出逆匪狂奔南竄經  
臣督兵跟剿署濟甯州知州黃良楷單縣知縣  
盧朝安在籍侍衛田在田各帶團首練勇四路  
搜殺潰匪村莊賊匪千有餘名實屬殺賊出力  
臣不敢沒其微勞可否仰懇

恩施准臣查明保奏奏入

上命軍機大臣傳諭勝保曰該大臣於十五日卽抵濟甯十七日發摺後始行起程尙須相機再進是直以班師自詡按轡徐行殊屬非是現在自阜城竄踞連鎮之賊卽係該大臣去年由豫晉追剿至直之賊並非另有一股此賊一日不滅卽該大臣一日不得辭責豈恃東境無賊爲全功而以應辦未了之事諉之他人耶據奏阜城賊蹤竄向何方尙無確耗何偵探

遲滯至此連鎮之賊跨河營巢死拒不出幾與獨流相等僧格林沁挖濠築壘分紮官兵於東西兩岸並將天津船隻停泊下游布置雖周而進攻總未得手所殺逆匪不過數十名且有伊勒東阿烏凌額受傷之事該處地勢河東較河西尤固勝保現從東岸進兵卽當迅速馳抵連鎮一面飛催善祿由西岸星速前進同抵該處合力進攻若任意遷延徒以休息兵

集賢堂 卷之二十一 三  
力爲詞自問何顏對朕功自功罪自罪斷不能希圖  
相抵也知州黃良楷知縣盧朝安在籍侍衛田在田  
各帶練勇搜殺賊匪著准其歸入豐縣勦賊出力各  
員內一體保奏候朕施恩

同日

上命軍機大臣傳諭僧格林沁曰前以阜城竄匪復踞  
連鎮諭令僧格林沁誘令出巢設伏殲勦數日以來

未據奏報不知該大臣作何布置朕心焦切萬分以此股賊情而論顯係伏匿抗拒意圖耗我兵力且牆垣堅厚米糧充足一經負隅久踞復蹈獨流故轍又將何以著手該大臣前奏挑濠築壘祇計及兜圍並未能迅速攻勦朕以勦賊重任畀之僧格林沁事權不爲不專大營兵力不爲不厚何以任令久困之賊突圍而出復不能乘勢掩殺爲前後邀截之計迫竄



入連鎮後又不能卽時勦洗任其從容布置該大臣  
貽誤遷延罪將誰諉現在勝保善祿統兵於運河東  
西兩岸分路北趨由東昌會齊前進若該逆果向南  
竄僧格林沁惟當竭力追殺而勝保等亦正可迎頭  
截擊儻仍伏匿連鎮則勝保計日趕到卽可合力進  
攻僧格林沁亦不得專待勝保到後始圖勦辦總之  
此股窮寇一日不滅畿輔一日不安朕急切苦衷該

大臣豈不知之著卽體察機宜嚴飭各路帶兵各員  
速籌進攻無論合圍攻擊或竄出截殺總期悉數殲  
滅迅速辦理朕斷不能再爲該大臣寬予限期也

二十二日

庚寅

僧格林沁西凌阿托明阿奏言十

五十六等日

臣等豫派馬步官兵伏於賊巢左

近該逆結隊而出我兵奮勇齊進兩次斃賊約  
百餘名十九日臣僧格林沁前往西岸會同臣

托明阿查看長濠地勢臣等僅帶親隨數十人  
該逆於明濠池北築起礮臺用礮擊打空濠人  
夫臣僧格林沁嘗派委參領玉亮帶領前次投  
出之張德順等將其礮臺拆毀該逆向臣等猛  
撲經臣等豫派設伏之馬隊官兵從兩翼抄出  
斃賊百餘名餘匪敗退該逆又撲出大股一千  
餘名臣等因附近賊巢地勢不平且恐馬隊深

入不能得力一面飛調步隊一面傳令馬隊撤  
同時瑞昌瑞麟督帶步隊業經趕到馬步齊進  
又斃賊二百餘名該逆連日受創死守不出現  
在惟有用大礮轟擊俾該逆潰圍而出攻勦或  
可得手

同日勝保奏言臣於十七日由濟甯督兵起程  
善祿帶兵由金鄉鉅野順運河西岸北上托克

通阿綿洵先赴東昌由鄭家口德州西岸一帶  
北上臣於十九日申刻行抵荏平約三四日內  
可抵連鎮前令善祿桂明各統所帶官兵留駐  
曹州以備南下善祿現已帶兵由運河西岸北  
上連勦阜城竄賊惟桂明帶陝甘官兵二千餘  
名尙駐曹州今楚豫軍情緊急自應遵

旨飭令迅速督兵前往第查武勝關地屬信陽臣上年

曾經過其地相度形勢固爲要隘然稍覺偏僻  
不如襄陽水陸通衢商賈輻輳爲賊素所垂涎  
且逆情詭譎聲東擊西是其故技不可不防臣  
已飛飭桂明卽統原帶官兵自曹州起程由劉  
家口或柳園口渡河馳赴許州一帶探明賊蹤  
所向如襄陽有警卽可由南陽前往迎擊如信  
陽喫緊卽馳往武勝關會合舒倫保併力防勦

均奏八

上命軍機大臣傳諭僧格林沁勝保曰逆匪竄踞連鎮  
雖經僧格林沁等督兵進剿小有斬獲未能埽穴擒  
渠剋期殄滅覽奏實深焦急該逆於連鎮挖濠築牆  
意圖久踞我兵惟用大礮轟擊仍不能出奇制勝力  
破賊巢似此曠日持久勦辦何時藏事勝保於十九  
日行抵荏平計日已可行至連鎮兩軍會剿兵力較

厚該大臣等務當協力同心迅圖攻勦儻該逆負隅  
死拒我兵不難四面兜圍爲就地鏟除之計設勢蹙  
南竄仍可設伏以待出其不意一鼓殲除軍情變幻  
靡常惟在該大臣等相機妥辦迅速奏功斷不可再  
延時日附近連鎮村莊是否有賊占踞萬勿任其裹  
脅居民並當嚴斷接濟使該逆援絕勢孤攻勦自易  
得力其東北一帶尤應加意嚴防毋令搶掠船隻再



滋延蔓前諭勝保酌撥官兵交桂明馳往楚豫交界  
會勦著卽嚴飭該提督與台湧舒倫保英桂楊需等  
互相知照探明何處緊要卽馳赴何處迎頭堵勦至  
東路鹽山慶雲一帶與山東武定毗連地方防守官  
兵勢尙單弱著僧格林沁勝保妥籌應如何撥兵扼  
要堵截並知照崇恩嚴飭地方文武與紳民人等實  
力防堵該大臣等務當統籌全局合力進攻總期早

滅妖氛肅清畿輔毋負委任

同日署河南巡撫鄭敦謹奏言連日據信陽州  
文武稟報逆匪前踞應山分赴各鄉搶掠揚言  
定期北犯於本月初七日全數南竄仍回德安  
又據南陽府縣稟報隨州之賊竄回武漢襄樊  
一帶尙無賊蹤又據羅山縣知縣稟報湖北逆  
匪在漢陽等處被官兵擊敗餘黨逃赴黃安縣

河口南沙河地方焚搶該處鄉民齊心殺賊斃  
匪五六百人奪回賊船六百餘隻並米糧衣物  
等件合境居民聞風爭奮約衆追殺復斃賊數  
百人該逆猶盤踞德安查豫省之信陽南陽與  
楚北犬牙相錯難保不乘虛偷越臣已飛飭南  
汝光道余炳燾等各帶兵勇仍於要隘處所極  
力嚴防復飛咨舒倫保俟所帶官兵齊抵信陽

卽會同湖廣督臣台湧合力進剿奏入

上命軍機大臣傳諭英桂楊靈鄭敦謹曰逆匪於初七日由應山竄回德安隨州之賊亦回武漢一帶總未大受創懲仍當防其北竄該撫等已飭南汝光道余炳燾等扼要設防並有柏山及舒倫保等在信陽一帶堵剿勝保又派桂明帶兵二千名由曹州直赴許州一帶探明賊蹤迎頭截擊各路官兵不爲單弱正

當乘機剿辦迅殄賊氛英桂現雖告假仍當與鄭敦  
謹合力同心妥籌布置楊需計已抵豫務卽確探楚  
豫交界處所何路緊要卽帶兵馳赴該處駐紮協同  
防剿

上又命軍機大臣傳諭台湧曰應山逆匪竄回德安隨  
州之賊亦竄回武漢襄樊一帶現無賊蹤著台湧卽  
就在營兵勇相機剿辦勝保已令桂明帶兵由曹州

探明賊蹤迎頭截擊並著台湧卽督飭現帶官兵與各路赴援之兵合力堵剿不得專事株守

上諭內閣曰軍興以來屢經降旨諭令各督撫飭屬團練鄉勇原期衆志成城人心自固該地方官果能實力奉行紳民人等定必踴躍用命自衛身家於剿匪事宜大有裨益本日署河南巡撫鄭敦謹奏據羅山縣探報湖北黃安縣南沙河地方有賊匪竄至經該

處鄉民斃賊數百並約會河口等處鄉民殺賊五六百人奪回逆船六百餘隻並米糧衣物等件該縣合境居民聞風爭奮約束追殺復斃賊數百人該民人等合力同心捍衛鄉閭甚屬可嘉若賊匪竄擾之處地方百姓皆能如此齊心禦賊何至任其蹂躪慘遭荼毒然總須地方官實心勸諭倡率有方遇有出力紳民卽行據實詳報上司隨時奏請獎勵庶使羣情

觀感協助官兵盡殲醜類所有此次黃安縣南沙河等處擊退賊匪之居民人等著台湧先行傳旨嘉獎並著查明出力紳民據實保奏現在被兵省分屢據奏報各屬紳民實能團練殺賊保衛地方者亦復不少著各路統兵大臣及督撫等嚴飭各府州縣勸導紳民一體實力團練果能辦有成效如近日天津饒陽單縣等處力挫賊鋒保全城邑者卽著隨時奏聞



定當格外施恩以獎忠義

二十三日 辛卯 駱秉章鮑起豹曾國藩奏言逆賊

大股水陸並進逼近省垣陸路之賊先散踞岳  
州湘陰各境賊船分布臨資口樟樹港喬口靖  
港等處連日北風甚勁大雨經旬水軍不能進  
勦北路水陸各賊聚泊靖港港外環列戰船堅  
築礮臺爲負隅之計三月二十四五等日臣曾

國藩飭水師各營駛赴靖港更番疊擊約共斃  
賊二百餘名擊沈賊船三隻燒賊火藥船一隻  
賊詞知省城水陸防勦綦嚴不敢闖入欲由陸  
路繞越甯鄉徑撲湘潭臣曾國藩先遣湘勇一  
千八百人扼要立營防賊侵軼二十五日賊分  
三股撲營湘勇力不能支紛紛潰敗二十六日  
塔齊布馳往援勦賊已於是日卯刻由間道直

赴湘潭塔齊布等亦卽繞道前進二十八日馳抵湘潭縣城外高嶺地方賊前隊於二十七日已到署湘潭縣知縣劉建德督勇於城外響水壩沙市嶺一帶堵禦賊已由西路暗襲縣城分遣死黨四處擄船並在城北豎立木城意圖久踞塔齊布以該逆頻年猖獗每用以守爲戰反客爲主之法若不及時速勦賊壘一定攻克爲

難卽於二十八日同周鳳山督帶弁兵壯勇分  
路進攻賊營槍礮如雨塔齊布令兵勇聞礮卽  
伏礮止卽進數伏數起直逼賊營各兵勇奮不  
顧身闖入賊營施放火箭火彈殺賊五百餘名  
燒斃無算生擒三十餘名二十九日塔齊布等  
分路進攻賊分五路出撲我軍縱橫血戰立斬  
僞統領先鋒六名僞都督元帥三名斃賊六百

餘名賊匪敗潰旋乘我兵造飯之時分路來撲  
我兵佯敗誘賊從營後繞出轟斃賊匪五百餘  
名追至嶺下塘邊四面圍偏淹死賊匪不計其  
數四月初一日賊復於城外高築木城選長髮  
老賊分路出拒塔齊布督率兵勇奮力衝突殺  
斃老賊數百人燒燬賊房無算生擒三十餘人  
追至城根復殺賊數百名其水面賊船經褚汝

航等督率戰船分隊進剿轟斃紅衣賊目十數  
名延燒賊船無數初二日復督船進攻擊沈賊  
船八十餘隻斃賊二百餘名褚汝航親點大礮  
擊死紅巾賊匪十數名又燬賊船二百餘隻斃  
賊三百餘名彭玉麟楊載福親坐小艇往來督  
戰先後燬賊船三百餘隻燒斃及生擒賊匪三  
百餘名岸上之賊亦被燒斃無算是日卯刻臣

會國藩親率大小戰船四十隻陸勇八百馳赴靖港上十里之白沙洲相機進剿午刻西南風陡發水流迅急戰船順風駛至靖港不能停留更番疊擊逆賊在礮臺開礮適中哨船頭桅各水勇急落帆收泊靖港對岸之銅官渚賊衆用小划船二百餘隻順風駛偪水營水勇開礮轟擊臣會國藩聞信急飭陸勇分三路速撲靖港

賊營以分賊勢初三日塔齊布偵賊在潭城窰灣地方高豎望樓逆賊散處潭城總市將由水路逃竄知會水師迅速兜剿遇船卽燒共燬賊船六七百隻賊屍沿江漂流該逆被燒情急復回縣城委員江忠淑會同署湘潭縣劉建德設伏城隅乘隙登城開門接應塔齊布揮兵直入將城中賊匪盡數搜殺敗殘餘匪紛紛竄逸已



飭塔齊布等四處搜拏升用同知直隸州知州  
王鑫追賊至雲湖橋魯家壩等處殺斃數百名  
湘潭縣城立即克復其由涿口竄至醴陵縣界  
約數百人將竄入江西萍鄉臣等飛咨江西撫  
臣速飭堵剿此次逆賊大舉南犯意圖竊踞湘  
潭與靖港之賊互爲首尾儻不及早撲滅不獨  
省城孤注難以圖存衡永郴桂及兩粵匪黨聞

風響應東南大局不堪設想幸仗

皇上威靈八日之間水陸十獲大勝全股掃蕩賊膽已  
寒現在靖港一股亟應回軍勦辦俟水陸兵勇  
調回卽行相機進攻補用副將塔齊布忠義奮  
發勇敢當先士卒樂爲之用通城勦賊已獲大  
勝此次復著奇功實屬武員中傑出之才懇請  
賞換花翎加總兵銜並

賞給勇號其餘文武員弁並請

逾格恩施給予獎敘

會國藩又奏言臣派水師剿賊靖港初二日靖  
港水勇潰散實由臣調度乖方自去冬欽奉

諭旨速援皖鄂兩省盼望旣殷臣之求效愈急而其辦  
理亦愈乖謬征戰之事論瞻技或兵不如勇論  
紀律則勇不如兵募勇萬餘人必須有大員協

同管帶又須有文武員弁及得力紳士一二百人節節統轄乃足互相維繫臣先時未能奏請大員幫同管帶又未多調文武員弁分布各營每營僅有一二官紳主之紀綱不密維繫不固以致潰散其謬一也靖港之戰臣因湘潭水陸大捷意欲同時並舉破賊老巢使賊首尾不能相顧是以風順水溜進戰則疾駛如飛退回則

寸步難挽逮賊舟來偪礮船牽挽維艱或縱火  
自焚或閒以資賊戰艦失去三分之一礮械失  
去四分之一是臣但知輕進之利不豫爲退敗  
之地其謬二也水勇無曾經行陣之人不得已  
召集船戶水手編派成軍訓練未及一月陸勇  
雖經訓練亦須隨同久經戰陣之兵接仗數次  
乃可期其得力今驅未經戰陣之勇驟當百戰

兇悍之賊一營稍挫全軍氣奪非真勇不可用  
乃臣不善調習而試用之故其謬三也臣整軍  
東下本思疾驅出境乃該逆大舉南犯臣師屢  
挫鄂省危急不能速援江面賊氛不能迅掃大  
負

聖主盼望殷切之意請

旨將臣交部從重治罪並懇

天恩特派大臣總統此軍臣非敢因時事萬難遂推諉而不復自任未經赴部之先仍當竭盡血誠一力經理如船隻已修水勇可恃臣亦必迅速駛赴下游不敢株守片刻

曾國藩又奏言臣於二月間知水勇未可盡恃咨會勞崇光代募水勇二千名已准咨覆派知府李孟羣管帶來楚尙未見到又查有廣西臬

司許祥光右江道張敬修皆夙諳水戰素蓄健  
卒製備火器多而且精該二員膽識過人與現  
在臣軍之褚汝航新經咨調之李孟羣均堪膺  
水路統領分領之選相應請

旨飭令許祥光張敬修各帶精勇礮械來楚併入此軍  
厚集其勢以保東南之全局儻蒙

俞允得謀勇兼優之大臣主之於上而以此數員者分



布其間必能同心戮力迅掃逆氛則臣雖身膺重罪亦足少紓耿耿之忱奏入

上命軍機大臣傳諭駱秉章塔齊布曾國藩曰此次湘潭水陸連獲大勝殺賊甚多惟大股雖已殲滅而靖港賊巢並未能同時攻破曾國藩復以輕進遭此挫衄若不亟圖勦辦恐該逆負隅抗拒必致牽綴我軍阻扼南北要衝駱秉章等現既移軍回勦務卽興塔

齊布等乘此聲勢分帶兵勇水陸夾攻爲一鼓成擒之計斷不准任令該逆踞巢死守再肆鴟張所稱由湘潭上竄下竄餘匪究竟奔突何處亦須探明趨向分派將弁竭力搜捕其由醴陵將竄萍鄉一股並著迅飭江西交界各文武一體嚴密堵剿曾國藩現在所存水陸各勇僅有四千餘人若率以東下誠恐兵力太單曾國藩現復添修戰船換募水勇據稱一兩

月間當有起色果能確有把握亦尙不難轉敗爲功  
目下楚北賊蹤由應山竄回德安隨州之賊亦回武  
漢是鄂省望援甚急該撫等務當督飭水陸各軍迅  
將此股敗竄之匪殲滅淨盡兼可赴援武昌以顧大  
局鮑起豹以提督大員安坐省中一無布置該撫等  
屢次奏報打仗情形均未敘及該提督畏葸無能已  
可概見本日降旨將鮑起豹革職不准留營特命塔

齊布署理提督全省水陸各營皆歸統轄該署提督責無旁貸卽著統領各路將弁相機進剿

上又命軍機大臣傳諭勞崇光曰據曾國藩奏潯梧一帶雇募水勇業經該撫咨覆交李孟羣管帶其許祥光張敬修二員能否赴楚助剿著勞崇光酌度緩急毋得顧此失彼

上諭內閣曰此次剿辦湘潭逆匪八日之間水陸十獲

大勝斃賊不下萬人奪獲船隻米糧火藥等項無算  
解散之衆亦以萬計著駱秉章塔齊布曾國藩卽督  
水陸兵勇乘勝進剿務將靖港賊匪一律掃除卽行  
統兵東下迅殄妖氛補用副將塔齊布前在茶陵剿  
匪出力業經賞換花翎著加恩賞加總兵銜並賞給  
喀屯巴圖魯名號守備周鳳山著以遊擊升用並賞  
換花翎卽補同知褚汝航著免補同知以知府儘先

補用並賞加道銜卽選知縣夏鑾著以同知升用千  
總楊載福著以守備補用並賞換花翎附生彭玉麟  
著以知縣遇缺卽選哨官張宏邦著以千總拔補訓  
導江忠淑著賞加五品銜至屯聚靖港逆船經會國  
藩親督舟師進剿雖有斬獲旋以風利水急戰船被  
焚以致兵勇多有潰敗據會國藩自請從重治罪姑  
念湘潭全勝水勇甚爲出力著加恩免其治罪卽行

革職仍趕緊督勇勦賊帶罪自效湖南提督鮑起豹  
自賊竄湖南以來並未帶兵出省疊次奏報軍務僅  
止列銜會奏提督有統轄全省官兵之責似此株守  
無能實屬大負委任鮑起豹著卽革職所有湖南提  
督印務卽著塔齊布暫行署理

同日青麀奏言 臣防守孤城設法攻勦餉路已  
絕惟念湖北省城有失則長江數千里均爲賊

踞尤恐克復爲難應請

旨飭下就近省分速撥精兵星夜來楚迅圖攻剿庶可  
轉危爲安

青麋又奏言查該逆占踞漢口漢陽與武昌爲  
一江之隔臣再三籌酌惟有由後路攻擊易於  
得手省中兵勇萬難分撥相應懇

恩迅飭督臣台湧來省會剿儻該處果有賊蹤意在北



竄督臣難以分身來省懇

飭署提臣佈克慎多帶兵弁前來如能將漢鎮疏通迅  
解省圍卽有零星餘匪擾及楚豫邊界省城亦  
可派兵追捕奏入

上命軍機大臣傳諭台湧青麐曰青麐請令台湧速行  
赴省之處尙未知江北實在情形逆匪由漢黃等府  
擾及德安時復窺伺荆襄其意方欲以蹂躪各屬使

武昌勢成坐困則我軍亦惟有以剿除各屬賊匪爲  
救援武昌之策此時台湧豈能置江北羣賊於不顧  
卽佈克慎所帶之兵均係收集潰散兵卒亦豈能衝  
賊而過直達武昌且武勝關爲入豫要隘台湧自以  
遏賊北竄爲要一面催提續調各路官兵爲進援鄂  
省之舉現據勝保奏報已遵旨飭令桂明帶陝甘官  
兵自曹州起程渡河馳赴許州一帶探明賊蹤兼程

前進四川援兵本日亦諭裕瑞飛催東下舒倫保於  
初七日由汜水起程剋日亦可抵關與台湧會合前  
調之羅玉斌勦辦江西匪徒現已蕝事亦可馳抵黃  
安一帶著台湧迅速催提並著就現有之兵設法分  
路攻勦自德安進逼漢陽庶省垣重地聲勢聯絡不  
致坐困青磨此時惟有督飭將弁兵勇激勵紳民極  
力守護省城該撫身任封圻全省之事皆應熟籌兼

顧不得以株守省城坐待援兵爲卸責地步也

上又命軍機大臣傳諭裕瑞曰巴東利川之兵赴楚協  
勦若待續調漢屯官兵接防始行起程必致有誤應  
援著迅飭帶兵員弁卽日前往不准耽延

二十四日壬辰勝保奏言臣由荏平起程督兵前

進馳過德州至柘園鎮距連鎮僅五十里擬卽  
督帶馬隊先行馳赴連鎮相機進勦奏入報

聞

二十五日癸巳袁甲三奏言探聞豐縣竄出之賊

經勝保等督兵追剿並徐州鎮道各督兵勇截  
殺餘匪於十三日竄至蕭縣境內經該縣文武  
督飭團練兩次接仗先勝後敗該逆仍由永城  
一帶南竄又聞逆賊於十六日竄擾蒙城東西  
北三門俱用木料屯閉現有兩三千人馬二百

餘匹勢將復熾臣已於由廬至蒙一路分派兵  
勇嚴密防禦如或他竄卽飭各將弁奮力窮追  
又恐賊由潁上霍邱一路竄回六廬臣並飛致  
秦定三擇要堵扼不至稍有疏失奏入

上命軍機大臣傳諭和春福濟袁甲三秦定三曰逆匪  
由豐縣竄出經勝保等督兵追勦斬擒殆盡徐州鎮  
道亦各督兵勇截殺該匪渡河時人馬並不甚多何

以竄至蕭縣境內尙能與兵勇兩次接仗且由蕭永  
一路沿途裹脅二三千人竄擾蒙城前據百勝王夢  
齡奏稱分紮豐工南北兩岸扼賊南竄又有李湘棻  
在南岸郝家集一帶防堵何竟任賊竄越到處裹脅  
所謂督兵截殺者安在該給事中旣派兵勇會剿著  
卽督飭文武員弁迅將此股逸匪在蒙城就地殲除  
前有旨諭令秦定三於抵正陽關後督飭郝光甲劉

玉豹等勦辦六安霍邱一帶賊匪並諭和春福濟於  
和州與江浦接壤地方防賊窺伺原恐金陵及廬州  
賊匪再行分股北來續圖援應該提督等務當於各  
處要隘實力嚴防毋稍大意李湘棻在南岸郝家集  
駐紮未能堵賊該革員所帶之兵一千餘名著交百  
勝王夢齡就近調撥並著袁甲三迅卽揀派得力將  
弁前往管帶北竄餘匪逃散偷渡者爲數諒必不少



且皖省逆賊聞風亦難保不續來勾結爲救援之計  
此時總宜嚴遏南來之賊並速將渡河回竄餘匪勒  
洗淨盡若稍遲延令與逆匪糾結又圖北竄惟該提  
督等是問

同日

上命軍機大臣傳諭僧格林沁曰朕聞阜城逆匪竄出  
時察哈爾官兵並未知覺迫將防濠之礮擲向營盤

轟擊始知賊出兵已大亂林淵詳爬越濠溝平毀濠  
牆賊衆跟出以致焚燬營盤搶去帳房百餘架馬匹  
駝隻數百匹傷亡兵丁數十人前據僧格林沁奏稱  
逆匪於初六日子刻撲出重濠燃燒帳房僅請將培  
成摘去頂戴烏凌額尙請因傷從寬免議迨逆匪竄  
至連鎖始奏稱培成營盤陣亡官兵八十餘名並未  
將培成失事實任情形及被賊搶去帳房駝馬火藥

各情詳細入告是該大臣前次奏叅培成顯有不實  
不盡逆匪竄踞阜城壘據僧格林沁等奏稱挖築濠  
牆杜賊竄逸乃初六日賊踞濠邊初九日全行南竄  
此數日中竟不能設法堵剿以致該逆竄踞連鎖餘  
燼復燃重煩兵力可見該大臣平日布置毫無把握  
至各營帶兵大員均歸該大臣節制有功則賞有罪  
則懲毫釐不容假借儻有失事之員卽當據實嚴叅

又豈可諱敗爲功所有培成營盤如何被燒逆匪如何撲出培成及該營兵丁是否在營何以毫無知覺帳房等件被賊搶去若干著該大臣迅速詳查據實具奏該大臣於軍營一切事宜自當秉公酌辦方足以折服人心不可稍有瞻徇回護致負委任

二十七日乙未僧格林沁勝保奏言逆匪自占踞

連鎮堅壁死守臣等恐該逆潰竄先於西岸挑

挖長濠尙未竣工該逆恐被圍困於二十二日  
夜復又占踞西岸村莊離所挖之濠甚近用礮  
擊打挖濠人夫所有業經擇定挖濠之處斷難  
工作祇得另行擇地挑挖惟地方愈廣工竣更  
需時日連日督兵進攻並用礮轟擊斃賊百餘  
名數十名不等二十二日進攻賊巢侍衛綢關  
奮勇爭先胸受槍傷是夜該逆由東岸撲出都

統西凌阿帶領馬隊官兵將該逆殺退臣勝保  
現於二十三日帶馬隊官兵馳抵連鎮當卽由  
東面繞至東北與臣僧格林沁會晤察看情形  
北面與東北西北兩面均經臣僧格林沁搭橋  
挖濠修築礮臺妥爲布置南面與東南西南兩  
面官兵不敷分撥稍覺空虛臣擬卽於賊營南  
面紮營一面調集船隻支搭浮橋可以東西接

應聲氣相通如果賊匪窮極思竄卽當認真擊殺痛加勦洗奏入

上命軍機大臣傳諭僧格林沁勝保曰該大臣等奏賊於初九日夜閒竄出占踞連鎮我兵緊接跟追何以遲至二十二日尙任該逆從容占踞西岸村莊且稱另行擇地挖濠是此十日之內所辦之工全歸無用偏逆匪愈占愈廣我兵濠塹亦將愈挖愈遠自來困

賊有此下策否阜城覆轍已可概見尙復沾沾必出此策耶勝保已抵該處步隊亦卽日到齊自當力籌進攻與僧格林沁和衷速辦此股逆匪本係勝保專辦不得一味諉過於人前此寄諭業已詳示若勝保竟恃山東勦賊爲莫大之功於連鎮勦辦事宜輒視爲有人分任徒事遷延斷不能逃朕洞鑒前此所諭誘賊出巢設伏出奇等事能否遵辦卽著相機妥籌



若任其負隅死守朕度該大臣等才力亦必不能剋  
日奏功也綳闊胸受槍傷實屬奮勇著發去白玉四  
喜搬指一箇玉靶小刀一把大荷包一對小荷包四  
箇交該侍衛祇領

二十八日

丙申

官文貴陞奏言賊匪由隨州棗陽

一帶竄至安陸荆門先後失守臣等查荆門界  
連荆襄爲南北往來必由之路亟撥兵一千二

百餘名派遊擊王國才參將佟攀梅分紮於龍  
會橋了角驛等處相機進剿四月十三日賊匪  
四千餘名直撲龍會橋軍營勢甚猖獗經王國  
才等督率滿漢官兵開放大礮該匪抵死相拒  
我兵奮勇直前斃賊甚多該逆豫於橋北一帶  
民房內暗伏王國才派令千總畢金科拋擲火  
彈焚斃伏賊百餘名餘匪逃竄王國才及佐領

玉貴等追殺至馬隍山復經貴陞率協領功額  
訥等從樂壤橋板橋兩處堵截佐領貴鳳等帶  
兵接應合隊攻殲賊衆潰逃復追殺二十餘里  
統計殺斃賊目四名逆賊七八百名十八日賊  
匪竄至浩子口地方經佟攀梅督兵奮勦斃賊  
二百餘名餘匪四散逃竄此次逆匪攻撲荆郡  
經官兵奮勇迎擊連獲勝仗軍威大振惟潛汚

一帶賊匪尙衆臣等仍當督飭官兵嚴密防守  
不敢稍有疏懈奏入

上命軍機大臣傳諭官文貴陞曰逆匪進逼荆郡經官  
文貴陞派遊擊王國才等督兵由東北二路奮力迎  
擊連獲勝仗剿辦尙爲得手惟安陸荆門係荊州前  
路屏障何以任令逆蹤先後竄踞尙未據台湧奏報  
此時固以力保荆郡爲要仍須乘勝相機迎截爲前

後扼勦之計該將軍等務卽嚴飭帶兵員弁迅圖截殺使該逆無由乘虛回竄方爲上策其逃散餘匪亦應加意搜捕免致蔓延勾結江路現尙阻隔湖南賊匪難保不旁竄勾結青麐坐守省垣有不能兼顧之勢台湧籌勦北路賊匪現擬由應山進攻德安等處所有荊郡一切勦辦機宜該將軍等務當隨時知照互爲策應豈得以驛路阻塞爲詞遂不思設法疏通

爲彼此援應之策耶

二十九日丁酉僧格林沁奏言查四月初六日該

逆趁風撲出站牆官兵見該逆撲近開放槍礮  
極力抵禦培成等營紮在東南是日西北風大  
作該逆搶上濠牆拋擲噴筒火罐致將培成營  
盤帳房火藥全行燃燒奏入

上諭內閣曰阜城賊匪既有長濠圍困又有各營官兵

沿濠紮營互相聯絡僧格林沁復派員時往查看何以四月初六日逆匪奔突竟從培成營盤全股竄出槍越濠牆並將帳房火藥燃燒失去駝馬一百餘匹是培成平日漫無準備臨事又不能實力堵擊畏葸無能已可概見僧格林沁前奏僅將該侍郎摘去頂戴不足蔽辜培成著卽革職仍留軍營效力贖罪儻再不知奮勉卽著從嚴懲辦

同日琦善奏言官軍於本月二十一日由東西兩岸進剿瓜州賊匪約斃賊五六百人復經追殺數十名外委張其彪等身受礮傷是日接仗因驟雨初霽塗潦未乾收隊時風雨復作致未得手臣視師日久焦灼萬分艇師各船延不上駛該總兵葉常春陳世忠署總兵李德麟周士法均係革職之員如果始終不知愧奮惟有從



嚴叅劾以肅戎行現在粵省拖風紅單各船尙  
無消息前奉

諭旨令閩浙廣東各省揀派水師人員來營調遣容俟  
該員等到營之日統帶水師接替有人再行察  
看以便酌量更換奏入

上命軍機大臣傳諭琦善曰琦善督兵進剿瓜州賊匪  
未能得手總由水師戰船不能得力之故琦善統帶

水陸各軍葉常春等均歸節制如該革員等竟敢始終疲玩託詞延宕致誤事機卽當以軍法從事前調閩廣水師人員尙未到營著卽飛催起程現在該大臣營中如有得力之員亦可暫行派令管帶俟紅單等船到時再行酌量派員更替至該匪以鎮江爲巢窟欲清江面必須於克復瓜州後以水師南擣鎮江與余萬清水陸夾攻若能克復鎮江則水師船隻可

以直達金陵俟施風紅單等船到江事機不可失也  
其儀徵浦口等處均有逆船窺伺雖俱經擊退仍當  
加意嚴防扼其北竄毋稍大意